

閩  
小  
紀







紀 小 聞  
(一之 鈴說)

撰工亮周

中華民國二十五年十二月初版

閩

撰者 周亮工

發行人 王雲五

印刷所 商務印書館 上海河南路

發行所 商務印書館 上海及各埠

編主五雲王  
編初成集書靈  
紀 小 閩  
一之鈴說

# 閩小紀上卷

櫟下周亮工櫟園撰

## 尤物

尤物必不產一地。荔閩楊梅三吳蘋婆北地。同能不如獨勝。故各散處。以自異耳。三君相見。必莫逆於心。乃世人紛紛。必欲執彝光太真。較量其孰勝。愚亦甚矣。揄揚過當。香火情深。予所不取也。

## 唱龍眼

龍眼枝甚柔脆。熟時曾慣手登採。恐其恣啖。與約曰。歌勿輟。輟則弗給值。樹葉扶疎。人坐綠陰中。高低斷續。嗚嗚弗已。遠聽之頗足娛耳。土人謂之唱龍眼。

## 絕技

閩中絕技五。會城去貪和尚之鬼工。毬莆田姚朝士指環濟機上之日晷。龍溪孫孺理一寸許之自鳴鐘。漳浦楊玉璇之一分許三分薄玲瓏之準提像。福清郭去問一葉紙上盡書全部陶詩。筆筆倣歐率更。

## 相思鳥

予過浦城得相思鳥。合雌雄一籠。初閉一縱。一一卽遠去。久之必覓道歸。宛轉自求速入。居者于其初歸。亦鳴躍喜接。三數縱之。則歸者居者意只尋常。若田間夫婦有出入。皆可數跡而至。不似閩人望遠蕩子。

思歸也。宿則以首互沒翼中。各屈其中距立。予常夜視之。驚失其一。久之覺距故。二而羽則加縱。笑語人曰。視此增伉儷之重。或有言獨閉雌能返雄。若閉雄則否。予視之不然。視同媚鬟。誣此貞禽矣。鬟負雌以遊。人呼曰鬟媚。得雌則雄不去。得雄則雌遠徙矣。

魚鯀嬌

閩蘭四時皆作花。氣洩過甚。香無爲芳之力。故不如過嶺之馥。且葉皆怒張。花亦劍立。真是男子所種。不若山蘭葉嫋花盈。枝枝向人索笑也。獨魚鯀嬌一種大異。魚鯀蘭以色白而莖高。取重于吳越人。皆見之。魚鯀嬌則莖質最弱。力不承花。竟以藤絲名莖。莖不受服。亦不忍直。日作莖花一綻。卽橫陳于碧葉中。若春閨思婦。甫勻枕痕。又倦欲寐者。莖莖斜誘。花花曲引。他蘭嫌葉力太盛。不足儼此。則若名姝既醉。非此解事侍兒。不足縱送扶掖。又若非白玉牀。不足當彝光笑倚者。並葉增嬌。將莖都豔。予偶得此種。驕語閩人曰。得火齊木難。足以壓多寶船矣。

龍蝦

相傳閩中龍蝦。大者重二十餘斤。鬚三尺餘。作杖。海上人習見之。予在會城。曾未一覩。後至漳。見極大者。亦不過三斤而止。頭目實作龍形。見之敬畏。戒不敢食。後從張廢陽席間誤食之。味如蟹螯。中肉鮮美。逾常。遂不能復噤矣。有空其肉爲燈者。貯火其中。電目血舌。朱鱗火鬚。如洞庭君。擘青天飛去時。携之江南。環觀橋舌。

江瑤柱

江瑤柱出興化之涵江。形如三四寸扁牛角。雙甲薄而脆。界畫如瓦楞。向日映之。絲絲綠玉。晃人眸子。而不堪食。美只雙柱。所謂柱亦如蛤中之有丁。蛤小則字以丁。此巨因美以柱也。味亦與蛤中丁不小異。蛤之美實亦在丁。人以其無多不審察。故獨讓江瑤擅此嘉名耳。興化人多以醬粉雜治之。又不知獨存柱味。不堪與車蠍伍。何足令不事口腹。人見之。朶頤耶。余熟以江水參以玉版。宋去損諸君食之。咸謂食指蠕蠕動也。會城初無此。謝在杭稱好事者。尙云從來未見其形。未識其味。他可知矣。予至後。令蟹人索之。梅花厂石間。時時得之。十年以來。遂與香螺蠍房參錯市中矣。乃知海干原未乏此。人驚以爲必無。不復過而問之。蟹人以無人過而問也。咸棄之不取。聞聲相思者。遂真以爲未曾有也。世之瑰奇異質。人驚以爲必無。不復過而問之。淪落于海沙江泥中。如江瑤者。不知凡幾矣。爲之一嘆。

汀城奇石

汀城東二里許。有奇石數十片。色蒼然。因名蒼玉洞。石磊磊不羣。有臨水竦立者。有相聯附若臂指者。有對峙若戶。環列若屏障者。郡人多觴詠於此。側一石。膚理光瑩。上鐫李斯壽字。予曾搨之。與今篆文頗異。題字皆不可辨。諸石嶙峋。其鋒鏘鏘。河東居民惑于形家言。每歲除夕。輒私募石工鑿之。諸石鋒稜殆盡。不累月。而石之童禿者。潛生默長。鋒稜如故。土人則復鑿之。嗟乎。山川靈異。欲恣人力以戕。異亦甚矣。

萬安橋

泉州萬安橋俗名雒陽在迎恩門東二十里長江限之橋踰數千尺宋蔡忠惠公所造泉郡橋之鉅與萬安塹與亞之者可三四數而四方之人與泉人獨好言萬安其言往往多愚以謂撰時揆日畫基所向鑽址所立皆預檄江水之神而得吉如世俗所傳醋字者至於鑿石伐木激浪以漲舟懸機以弦繹每有危險神則來相址石所桑蠣輒封之而公自爲記及舊泉誌中皆無是也公所記寥寥百十言俱記時日與所費工貲耳亦無所鋪張五百餘年來後人尙復侈大其事托于神而美之當時固視之漠然與尋常輿梁等古人信不可及哉橋盡爲公祠予甲午過其地拜公祠下見公所書二碑無額無欄製殊古樸立公像左右相傳倭變時倭舟載其右一碑去後人補之今宦其地者類使人搨碑郡人憚遠途又索者多乃別爲木本以應泉州僞搨不止銀錠淳化也余記萬安橋事嘆蔡忠惠文字之簡捫蟲新話云旣言其長二千六百又翼以扶欄又言如其數而兩之此六字爲贅雖搜剔太些然六字亦竟可省

白打

予邵武寒食詩有幕府健兒猶白打之句按王建詩寒食內人常白打庫中先散與金錢韋莊詩內官初賜清明火上相間分白打錢楊用修曰打錢戲名未明指爲何事焦弱侯云按齊云論白打蹴踘戲也兩人對踢爲白打三人角踢爲官場予謂白打卽今之手搏名短打者是也昔人目手不持寸鐵爲白戰似卽其意武藝十八終以白打以白打爲終明乎其不持寸鐵也以爲蹴踘者非

蝗苗

予爲閩臬時吳航民有訟隣人拔其蝗苗者予初意蝗安得苗及訊之出一紙裏小蝗纍纍細如蟻蟲蓋閩人培水田種蝗盜者淺水則蝗苗隨之溢訟者輒曰拔我苗矣玉堂閒話中載瀕海人有蔬圃乃淺水中積沙而成或爲大風飄去若浮筏然番禺有人訟失去蔬圃爲人所匿在百里外者拔蝗苗失蔬圃異事的對

橋梁

閩中橋梁最爲巨麗橋上架屋翼翼楚楚無處不堪圖書吳文中落筆卽倣而爲之第以閩地多雨欲便于憩足者兩簷下類覆以木板深輒數尺俯欄有致遊目無餘似畏人見好山色故障之者予每度一橋輒爲愴嘆

閩茶

武彝芳巒紫帽龍山皆產茶僧拙于焙旣採則先蒸而後焙故色多紫赤只堪供宮中洗濯用耳近有以松蘿法製之者卽試之色香亦具足經旬月則紫赤如故蓋製茶者不過土著數僧耳語三吳之法轉轉相效舊態畢露此須如昔人論琵琶法使數年不近盡忘其故調而後以三吳之法行之或有當也

建州貢茶自宋蔡忠惠始小龍團亦剏于忠惠時有士人亦爲此之誚

龍焙泉在城東鳳凰山一名御泉宋時取此水造茶入貢

北苑亦在郡城東先是建州貢茶首稱北苑龍團而武彝石乳之名未著至元設場于武彝遂與北苑併稱今則但知有武彝不知有北苑矣吳越間人頗不足閩茶而甚豔北苑之名不知北苑實在閩也

御茶園在武彝第四曲喊山臺通仙井俱在園畔前朝著令每歲驚蟄日有司爲文致祭祭畢鳴金擊鼓臺上揚聲同喊曰茶發芽井水既滿用以製茶上供凡九百九十九斤製畢水遂渾濁而縮武彝產茶甚多黃冠旣獲茶利遂偏種之一時松括樵蘇殆盡及其後崇安令例致諸貴人所取不費黃冠若干追呼盡研所種武彝真茶九曲遂濯濯矣

歛人閔汝水居桃葉渡上予往品茶其家見其水火皆自任以小酒盞酌客頗極烹飲態正如德山擔青龍鈔高自矜許而已不足異也秣陵好事者嘗謂閩無茶謂閩客得閔茶咸製爲羅囊佩而嗅之以代旃檀實則閩不重汝水也閩客游秣陵者宋比玉洪仲章輩類依附吳兒強作解事賤家雞而貴野鷺宜爲其所誚歟三山薛老亦秦淮汝水也薛嘗言汝水假他味逼作蘭香究使茶之真味盡失汝水而在聞此亦當色沮薛嘗住吳崩自爲剪焙遂欲駕汝水上余謂茶難以香名況以蘭香定茶乃咫尺見也頗以薛老論爲善

前朝不貴閩茶卽貢者亦只備宮中澆灌甌盞之需貢使類以價貨京師所有者納之間有採辦皆劍津鹽地產非武彝也黃冠每市山下茶登山貿之閩人以粗糲臘瓶貯茶近鼓山支提新茗出一時學新安製爲方圓錫具遂覺神采奕奕

天姥山茶名綠雪芽。

閩酒數郡如一。茶亦類是。今年余得茶甚夥。學坡公義酒事。盡合爲一。然與未合無異也。蔡忠惠茶錄石刻在甌寧邑庠壁間。予五年前揭數紙寄所知。今漫漶不如前矣。

延邵呼製茶人爲碧豎。富沙陷後。碧豎盡在綠林中矣。

崇安殷令招黃山僧以松蘿法製建茶塘並駕。今年余分得數兩。甚珍重之。時有武彝松蘿之目。鼓山半巖茶色香風味當爲閩中第一。不讓虎邱龍井也。雨前者每兩僅十錢。其價廉甚。一云前朝每歲進貢至楊文敏當國。始奏罷之。然近來官取其擾甚于進貢矣。

閩酒

閩酒自浦城至延平。如玉帶春。梨花白。品類雜出。實皆臘白耳。會城獨多佳酒。藍家酒最有聲。品亦最下。當時或不如是。碧霞酒新出。非甘非冽。人世乃有此惡味。莆田以至清漳皆雙投酒。非火春不可成。甚不宜人。三郡人皆云。會城無酒。非無酒也。無火春重釀之酒也。會城中以曾家之蓮鬚白爲最。

莆人以重九日採草爲麴。郊垌兒女如蟻歸則和米搗成。如彈丸大。

重釀。莆酒名似三白。玉帶春。建酒名。莆人以長至前合釀。入夏不壞。

襄陵酒名其麴。夜則飲露。晝復曬之。味嚴冽。縱量大者飲不過五斤。

三山以藍酒直益爲最。又有蓮鬚酒。冬白老酒。家每沽人一壺。取灰沃之。味方不變。飲之必渴。或云水鹹。

有灰下之其酒始成。

白甜卽官白酒又有麻姑酒新醅酒

閩人讀醅爲妹作去音

短白卽延平之水酒延人至今猶用宋錢相貿易呼爲老錢。

順昌酒出本縣者佳酒未釀曰生燒順人取藥和之埋地中至隔年出之則藏以小罐盛以竹筐連他處鬻之亦曰五香燒。

建寧有梨花春河清西施紅狀元紅以河清爲冠味沉厚蜜釀醕金盤菊二種亦出建州。

潭陽有賽京華健步駐顏九種蘭九種蘭經春夏秋三季每過一月則易一種蘭香唯李家延賓則九種次第而陳玉液瓊漿不足喻矣。

建酒俱以冬釀至春夏則無所擅其技矣唯潭是臣所監麴種值臘月用石缸將種藏之以收嚴烈之氣雖炎暑入釀與冬無異名曰是臣石醕雪酒收雪水釀之夏月飲之可銷暑。

潭善釀者三家曰詹曰吳曰李李葉青蘇合酒金酒檀酒皆潭佳品李葉青爲李家製以井近錦江而香味甘冽故又名錦江沁液以酒釀酒曰雙夾樵川人多製之一名邵春酒色深紅歲首用以酌客。

莆以荔枝入釀三年藏之其色如墨傾之則滿座幽香郁烈如荔熟坐楓亭樹下時也若福清人以龍眼山棗入釀品斯劣矣。

安定郡王以柑製酒名曰洞庭春色泉漳人傳其法曰橘酒飲有餘香。

葵豆和釀味亦醇厚唯葡萄則依西洋人製之奉其教者閩俗甚熾取此酒以祀天主名曰天酒若薏苡則又帶黏矣

蘭桂菊諸花閩人皆以釀酒唯菊有林下風味

海澄人善蒸梅及薔薇露取之如燒酒法每酒一壺滴露少許亦異品也

### 海錯

閩中海錯雖蛤不四明蟹不秦郵然種種咸備使醞漬得宜亦足匹美三吳乃釀糟無法腥鹹相角土人所珍蠶醬土苗之類尤不堪下箸也

### 才雋

閩中才雋輩出穎異之士頗多能詩者十得六七壺蘭以下間有拘字會城以上則居然正音彬彬風雅亦云盛矣第晉安一派流傳未已守林儀部高典籍之論若金科玉條凜不敢犯動爲七律如出一手近頗有尤異之士逸出其間者然不勝慎守故調者之多

八閩士人咸能作小楷而會城人尤工此兩浙三吳所未有勿論江以北也第舍古法不遵而專學林處士寵處士正書倣歐率更而間以黃庭之意行之處士意在以勁婉驛騎兩家而學者專尚其嫵媚千腕一律數見不鮮並處士亦爲人口實矣

凡此皆予閩中憾事至于蘭過嶺始芬書十年卽腐此則天制之非人力所能爲也

接龍眼

去閩會二十里東南隅多龍眼樹樹三接者爲頂圓核之初種經十五年始實實甚小俗呼爲胡椒眼覓善接者鋸木之半取大實之幼枝接之至四五年又鋸其半接如前若此者三數次其實滿溢倍于常種若一二接即止者形小味薄不足尙也三接者曰針樹未接者曰野筭

佛手柿

閩南郊外二十里曰齊坑齊氏聚族其間旁有潭夾種桃花相傳唐陳處士隱地舊名道者巖巖前有柿一株根如斗結實如佛手柑指屈伸層疊有長五六寸者皮穰色味則皆柿也余偶得其一笑謂友人曰大力如佛菩薩到此地亦化爲繞指柔

樸荔

閩種荔枝龍眼家多不自採吳越賈人春時即入貲估計其園吳越人曰斷閩人曰樸有樸花者樸孕者樸青者樹主與樸者情慣估鄉老爲互人互人環樹指示曰某樹得乾幾許某少差某較勝雖以見時之多寡言而後日之風雨之肥瘠互人皆意而得之他日摘焙與所估不甚遠估時兩家賄互人樹家囑多樸家囑少

荔歌

荔樹有百年者四五年者圓不圓滿類作雞骨形雖未飽霜雪皮輒作濫鐵怪石色或間一歲實即歲實

亦卽半生或分四方。歲一方實。土人謂之歇枝。灌培者識其性。亦歲易其方。余初至閩。署齋前一樹。方歇枝。余顏其室曰荔歇。作荔歇詩。

### 閩關以上無荔

閩函關以上無荔。延建人有終身未啖荔者。汀亦只永定有一二株。漸向南。則漸多。卽地同南。樹較茂。樹同南。枝亦較茂。南枝不歇。實亦倍他枝。

### 石背

荔葉終冬不落。有蟲如荔核。冬伏葉下。荔始挺花。蟲亦生子。一生十二粒。數應一歲。閩則增其一。土人名曰石背。言背堅如石也。荔之蟲害。害如菊虎。荔香時。石背輒溺。溺則全枝脫蒂。除禳無術。雨多則尤盛。長堂前。荔半熟。將延客。命酒。囑吏謹伺之。勿飽鼠雀。吏蠱蹙曰。今歲石背多。臬公曰。十倍多。正佳。吏愈答。愈不明。至搖頭灑泣。滿堂匿笑。

### 畊田

閩中壤狹。田少。山麓皆治爲隴畝。昔人所謂畊田也。喪亂以來。逃亡略盡。畊田蕪穢盡矣。予寒食。登邵武詩話樓。詩有遺令不須仍禁火。四郊茅舍久無煙之句。及觀唐韓偓過閩中。有千村冷落如寒食。不見人煙。只見花之句。明張式之撫閩。亦有除夜不須燒爆竹。四山烽火照人紅之句。千古有同悲也。式之名楷。慈溪人。永樂甲辰進士。以賦此詩爲言者所劾而罷。

茉莉樹

墨莊漫錄載襄陽唐氏瑞香一株面闊一丈二三尺婆娑如蓋下可坐胡床又李居仁言舒州山中深巖間附石生瑞香一株高二三丈下可坐十餘人余在樵川見黃孝廉書齋前二茉莉樹高二丈餘掩映三間屋高雲客爲予言連江鐵鬚隱處秋海棠高一丈餘圍可一二寸許皆異種也

燕窩

燕窩菜竟不別是何物漳海邊已有之蓋海燕所築啣之飛渡海中翮力倦則擲置海而浮之若杯身坐其中久之復啣以飛多爲海風吹泊山澳海人得之以貨大奇大奇又見瓦釜漫記余在漳南詢之海上人皆云燕啣小魚粘之于石久而成窩據前言則當名爲燕舟據海上人言亦可名爲燕室矣有烏白紅三色烏色品最下紅色最難得白色能愈痰疾紅色有益小兒痘疹南人但呼曰燕窩北人加以菜字

珍珠傘

汀西邱坑口撥土一寸許卽有明珠大如粟色若水晶較之珠光少晦相傳爲聖七娘率師至此有珍珠傘爲敵所破當卽咒曰男拈之成水女拈之成粉雖事屬荒唐而男女得珠者誠如所傳又人言南宋時汪革僧據歙郡與其妻巡行山川堵築險要以修四塞之固出入張珍珠傘爲美觀一日天驟風掣傘于雲表良久墮下珠悉迸落草間因生草綴珠至今人名爲珍珠傘云二事殊相類

方竹杖

東南之竹最盛。而閩中種類尤多。奇形異狀。產于陰崖深壑中者。不可勝紀。然世人皆重方竹。以規方竹杖爲不韻。似皆以爲異物。閩汀之永定。邵之泰寧。皆產方竹。余常得數十枝。笑謂友人。如此賤植。卽令暫規數枝。未便不韻。

### 夾竹桃

閩中多夾竹桃。葉微如竹。花逼似桃。柔豔異常。予常謂友人曰。此陶靖節賦閒情時也。千載後。猶時時見之。此種閩人不甚貴重。過嶺卽不生。虎林一郡。聞只三數株。金陵間有。然亦無過三五歲者。曾師建閩中記。南方花。有北地所無者。閹提茉莉。俱那異。皆出西域。盛傳閩中。俱那衛。卽俱那異夾竹桃也。

### 榕樹

閩中多榕樹。垂鬚入地。輒復生根。常有一樹作十數幹。有卽榕爲門者。相傳千年榕。其上生奇南香。余每見老榕樹。愛其婆娑。輒徘徊不能去。高雲客時謔余曰。公欲覓奇南香耶。

### 水晶丸

荔枝種類最繁。予在閩中。盡飽嘗之。當以莆中宋家香爲第一。肉肥核小。固足尙。蒂實作旃檀香。尤足異也。水晶丸。較諸荔最小。而味最甘實。而不核。閩人歲以數十枚遺予。然終不令予知其產處。有云。卽在會城中者。然生長會城者。亦不得嘗之。焦核。產漳浦。核小肉厚。與宋家香同。但無香耳。相傳荔枝去其宗根。用火燔過植之。生子多肉。而核如丁香。如六畜去勢。則易肥也。漳浦人多用此法。以其火燔。故名焦核。外

人誤作焦葉。

不解

予在閩前後十二載有不解者七于神不解太保舍人于術不解林三教于人不解番民于酒不解碧霞于海錯不解蠶于菓不解羊桃于文不解謝耳伯

柳

相傳二十八宿中有柳故種柳者橫插倒植無不立生余在閩八郡俱至道傍曾未見一枝會城中僅十數株漳城纔三四株豈柳星獨不照閩中耶誠所不解

龜

漳州孫孺理爲余言曾泛琉球見一龜以四小龜爲趾相連無少痕跡欲前則小龜昂首觸動進止亦無少違合只覺一體尙非并命若行止似示以意則疑義合乎

火浣布

予在敢園謝茂才爾將出布一縷以火焚之色盡赤以爲灰矣火滅布如故爾將云卽火浣也二十年前閩中多有見之亦不甚貴今不可得矣乃知海外自有此一種昔人以爲炎山木皮所織又有以爲火鼠毛者以爲木皮者近是以其色似麻苧不類褐罽也

李驥

永樂壬辰狀元馬鐸戊戌狀元李騏俱福州長樂人耳。談謂馬母後適李復生騏。予常屬長樂令君呂素巖詢其邑中前輩俱云無之。而兩家後人亦云世俗謬傳絕無影響。且當時亦無增馬爲騏之事。乃知耳談所載類多不經如此。騏卽一母所生方且爲母諱。何至以前夫之姓爲名。公然暴母之短耶。不辨明矣。

### 林太守春澤

侯官林太守春澤正德甲戌進士爲戶部主事疏諫南巡遷員外郎司藏失盜謫官後陞南刑部郎出知松番免歸公生于成化庚子萬曆己卯年百歲有司爲建人瑞坊子應亮以戶部侍郎侍養亦年七十矣。起拜豐蹠如壯年應亮子如楚工部侍郎公至癸未十月卒年百有四歲少年與鄭少谷方棠陵張崑崙爲詩友應亮則少谷之壻也有人瑞翁詩十二卷行世公常與司農司空田中觀耘鄉人立碑記之一時以爲盛事。公百歲時尙舉一女後配雲南督學鄧公原岳相傳公服松梅丸故得大年其法取松脂用河水浸四十九日文武火煮令白如餳然後和烏梅地黃爲丸服之大便常秘結翁暮年生菓井水不去口終不泄瀉他人服之火盛慾熾多得奇疾蓋翁秉負有異非關服食也。

### 林太守元美

閩縣林太守元美永樂辛丑進士子泉山公瀚謚文安以大司馬改南冢宰文安公九子庭樞大司空庭機大宗伯庭楷指揮庭楨麗遠守庭珍湖州司理庭楫子炫通參庭機子燦大宗伯炫大司空凡三代典成均一門五尙書而他蔭敍及舉孝廉者又不下數十人可謂盛矣會城人常言文安公方建屋樑橫於

戶侍女騎而出，匠置之。女曰：何異？閤老尙書不此中出耶？公異其語，召欲私之。女正色曰：何可草草！公高年脫孕後，誰明予者？盍書數字爲據？公命取側理，女入公室，以絳色機綬全端至。公益奇其志，遂書舉男以機名女，以綬名後舉男。是爲大宗伯。復舉女配侍郎鄭公。公之後人有從予遊者，亦常以此語予絳綬至今尙藏其家，誠異事也。

林宗伯

林小泉公庭機子，對山公廉俱爲大宗伯。晚年歸里，大宗伯與大司馬馬公森、少司農林公應亮並輿出。值小宗伯至，拱立輿傍，兩公趨下揖。大宗伯曰：二公吾密友，兒子于禮應侍立，下輿過矣。拉之升輿去，回視小宗伯，尙恭立久之。里人誇以爲美談。

莆田黃氏解元

閩莆田黃氏，自明開科來，一姓解元十一人。永樂十年戊子，應天解元黃壽生；正統九年甲子，解元黃譽。天順六年壬午，解元黃初成化四年戊子，解元黃文琳。成化十年甲午，解元黃乾亨。宏治十七年解元黃如金。正德五年庚午，解元黃庭宣。嘉靖二十三年癸卯，解元黃繼周。二十八年己酉，解元黃大觀。三十一年壬子，解元黃星耀。三十四年乙卯，解元黃懋冲。其餘五魁之內，合歷科又不下二十人。

幼年科第

閩福州林按察使文秩，泉州黃孝廉日曜，俱年十四舉于鄉。興化戴探花大賓。十三歲中，宏治辛丑進士。

福州、林庶吉士文穡以十三歲舉永樂甲午榜。

土筭

予在閩常食土筭凍味甚鮮異但聞其生於海濱形類蚯蚓終不識作何狀後閱寧波誌沙噀塊然一物如牛馬腸臟頭長可五六寸許肥軟如水蟲無首無目無皮骨但能蠕動觸之則縮小如桃栗徐復臃腫去涎腥雜五辣煮之脆美爲上味乃知余所食者卽沙噀也閩人誤呼爲筭云予姻有肥而無骨者予以沙噀呼之衆初不解後覩者咸爲匿笑沙噀性大寒多食能令人暴下謝在杭作泥筭樂清人呼爲沙蒜

線蟲

延平一郡人皆接竹取水分枝別派高低遠近互達于釜其中往往有蟲細如髮長可二尺許土人呼線蟲予偶聞父老言歸視瓮中果得其一以手引之不驟斷試之水復蠕動若有知識者似亦射工沙蜮之類聞食之者多生癥瘕然余未見時不知誤食幾許矣又言經火卽不害人故閩溪水不可生飲

沒子

閩地有小蟲若微塵視之不能見刺人較蚊蚋尤甚密帷亦不能間之名沒子江南人謂之莫讀作平聲京師卑濕處亦有之俗名金剛鑽相傳爲此蟲所刺愈扒搔則愈集癢愈甚但置之不見不聞則自去殊不然



# 閩小紀下卷

櫟下周亮工櫟園撰

## 仙霞兜子

今入閩度仙霞者必乘竹兜子淮南王安諫擊閩越書輿轎而踰嶺則知竹兜之制漢已有之矣今仕者乘轎古無是制轎字亦始見於此

## 大清明

閩將樂歸化人以三月爲小清明八月爲大清明展墓者或小廢無敢大廢者予庚寅仲秋過其地火焰山下壞皆正赤紙錢遍野雪如霞如作大清明曲孤墳亦識歲時更短竹齊挑八月蠶赤壞青松雪色紙鏞州獨作大清明一銀瓶山下展新塋蟹櫈紛將橡栗盛敢向春風偏認小長眠人亦畏秋聲二骷髅欲共鐵犁爭閱盡春秋鬼不盲莫嘆雲仍渾忘卻舊墳強半小清明三

## 玉華洞

玉華洞在將樂之南去邑三里許予庚寅秋往游洞深約三四里洞中乳石所結差具人物形而當時好事者又加之規削遂使人世所有無不畢具最奇者鍾乳注爲傘形闊可四丈許圓好如人製簪作數重垂垂欲動又有垂而下仰望之甚巨漸垂漸細如針中復斷而承接處亦如針不復漸巨俗名之曰天平

石此則天工成之非人力所能爲也。洞中昏黑必秉炬而入歲久四壁皆煙煤行者捫掖而上掌皆黑黝閩人謂紫陽鍾武彝龜山鍾玉華彼武彝無論矣若鍾此幽晦詰曲而生其人殊可畏哉真誥稱句曲洞天虛宮之內皆有石塔曲承門口往來上下都不覺是洞天之中謂是外之道路日月之光旣自不異草木水澤與外無別飛鳥交橫風雲翕鬱洞壑必如是始堪置足若黑黝如阿鼻獄人亦何樂遊此洞口風聲如錢塘初三十八之潮使人畏不敢入洞尾殊空闊目光透入遠視之如滿月實則兩巖互缺合望之圓如規然兩巖相去又甚遠日光所入旣微而巖又深幽人驟從黑黝中來恍惚有所見如東方旦時俗名之五更天實似之肅立其中氣如平旦洞中所有旣甚奇幻予皆不取惟洞口之聲洞尾之色實自奇幻賴此起結差慰老眼耳洞中產石卽四方所傳礬石鑿削已盡不能得佳者然卽佳亦只一面精瑩耳。

馬蹄帖

泉州淳化閣帖十卷相傳宋季南狩遺于泉州已而石刻湮池中久之時出光怪櫬馬驚怖發之旣是帖也故泉人名其帖曰馬蹄真跡宋沈源釋文序云是帖納郡庠歲遠剝蝕其後莊少師復摹以傳則今帖非馬蹄真跡乃莊氏摹刻也其石先屬張氏後以其半質錢于族秘匿不返今所傳者旣非宋遺而莊摹者亦皆割裂遞更遞失矣惟蔡沙塘少參家所藏七塊完好不剝蔡甚寶之欲得莊刻之全必求數家而合之然不易也莊少師名夏登淳熙八年進士有文名

武宗時閩僉憲林公文纘赴京謁補舟抵潞河適武宗巡幸至突入舫文纘俯伏船頭上鞭指之曰汝何從知隨入舟時文纘家口咸匿艤下止一婢抱纘六歲兒立艤中上問曰此何人纘奏曰臣子上抱置膝曰相好當與朕爲子纘奏曰恐臣子無福上又指婢曰仍命此女抱携之時護蹕人至踉蹌促去兒入宮思父母日夜啼百計誘之終弗止文纘亦入都與素識大璫謀欲出兒璫乘機奏曰此兒誠薄福啼既弗止不如舍之且收留乞養祖宗有禁上曰林某凢汝作說客耶如再啼當棄之水璫懼亟與文纘謀覓善泅者伏河側兒啼不止上果棄之河中泅者故拉兒入水伺上回急出之兒僵矣文纘抱哭不已久之始甦文纘補官嶺南亟携兒去不久又休致歸杜門課子廿一歲舉於鄉又四年成進士名璧世宗出武宗朝宮人前婢亦在列婢無歸問閩紳姓名人謂須至福州會館詢乃得婢至館問有林紳否時璧適在寓以爲詢已也急出應及見婢曰非公我所詢者老年人問何名曰是林文纘璧大驚曰此我父也汝何從知之婢語之故璧又問曰所抱之子何名婢言乳名並所生時月璧泣曰我也遂與婢抱首哭養之寓中携歸鄉文纘見之亦泣從其志奉佛茹素終其天年文纘至九十五歲無疾而歿璧性伉直與時不合屢官屢蹶文纘與分宜爲同年璧體父志終不附分宜官亦止僉憲居無一椽家於祠堂小童共炊爨亦世之所僅見者廉介詳於郡志公曾孫惠州太守崇孚面語予如此

收香鳥

朝野僉載劍南彭蜀間有鳥大如指五色畢具有冠似鳳食桐花謂之桐花鳳李德裕有桐花鳳扇賦序

劉續霏雪錄云。東坡有倒掛綠毛么鳳之詞。唐僧隱巒詩。五色毛衣比鳳雛。深春花裏只如無。美人買得偏憐愛。移向金釵重幾銖。益部方物略記。桐花鳳。二月桐花始開。是鳥翹翔其間。丹碧成文。鐵嘴長尾。仰露以飲。至花落輒去。李之儀云。此鳥以十二月來。日間焚好香。則收而藏之。羽翼間夜。則張尾翼。而倒掛以放香。一名收香倒掛。又名探花使。性極馴。好集美人釵上。宴客終席不去。余在閩。黃將軍以一雙倒掛鳥來。遍體嫩綠。楚楚憐人。腹背之毳。則雜五色。注距皆赤。曲肖鸚鵡。但小僅如雀。尾輕而長。不似鸚鵡之重直耳。兒子皆以小鸚哥呼之。日夜倒掛。不習其性。越數日。死死也。猶足高于首。掛弗釋。予悲以詩。有籠中閒綠猶虛掛。腋裏名香不更收。之句。此鳥之大。何止如指。重又何止幾銖。權十分黍之重。曰銖二十四銖爲兩。抑豈能移向金釵。絕無冠安得似鳳。乃知收香倒掛。與桐花鳳。自另兩種。坡仙之咏。亦以桐花鳳形容。之後人緣此詞。遂訛爲一耳。然閉籠無幾憾。未試其收香也。

鷓鴣

閩山多鷄鴣。行不得哥哥。五字絕分明。不似他鳥言。須以意會也。望之如家雞。質若甚重。權之止十二兩。有縮者。無一越者。

九鯉湖鷗

鷗皆白。惟莆田九鯉湖中鷗作粉紅色。嬌豔異常。清異錄載隋宦者劉繼銓獻芙蓉鷗二十四隻。毛色如芙蓉。鯉湖之鷗。正當以此嘉名錫之。

閩女

閩素足女多簪全枝蘭煙鬢掩映衆蕙爭芳響屨一鳴全莖振媚予常笑謂昔人有肉臺盤此肉花盍也繼在京師見唐人美人圖亦簪全蘭乃知閩女正堪入畫向者之評謬矣

樹蘭

閩廣多樹蘭花與珍珠蘭同但彼草木此木本耳友人有謬謂卽古之木蘭者然樹蘭圍皆寸許陸龜蒙詩幾度木蘭舟上望不知原是此花身樹蘭之木可爲舟耶徐君義言古有木蘭而無玉蘭今則有玉蘭而無木蘭余謂木蘭卽今之玉蘭余聞之蜀人言蜀山中玉蘭高皆數十尺圓皆數圍花開時滿山如雪龜蒙所咏似卽此也珍珠蘭在吳越間得一本真如珠樹長泰南靖人家溷廁間皆是

蜜瀆蘭

人言蘭花不可食此爲珍珠蘭誤耳珍珠蘭雖非斷腸草然食其根亦能傷人蘭花則否余常見建寧人家蜜瀆蘭花冬月以之點茗一花泛泛鮮如初摘正如湘女凌波時不止壓倒昔人清泉白石也或曰蘭必蜜後始可食

死有前定

延平嚴九岳第進士授廣西南寧府推官其地有九岳神祠後歷部郎陞岳州太守未任卒于途松溪魏濬號蒼水累官湖廣巡撫途中見有蒼水神祠未蒞任卒閩縣林憲護號古榕第進士授中書奉使至廣

東憩行臺見後軒扁古榕二字是夕卒名號關於死生異哉

林異祠

金鳳傳

王永啓曰予居高蓋山中有農家掘地遇土穴得銀錢數枚色黑如漆石硯一銅爐銅刀各一有篆文乾德五年造又石匣一啓視有抄書一帙爲陳后金鳳傳不著作者姓名楮墨漫滅而字跡猶可句讀農家弗能省予亟往索歸參之史乘諸書始末多不異因與友人徐燦訂正之夫飛燕別傳出諸壞墻南部煙花檢之廢閣前人藏秘後人搜傳均有意焉諸王縱慾以亡其國固末世之明戒也是宜傳之以存野史之一予在閩徐存永爲余言陳金鳳外傳是其叔孝廉幔亭氏所爲幔亭名燦燦之弟也燦字興公皆以文名乃知近今撰托之書不獨天祿外史爲然傳之後世誰復辨之耶

江矠臣

江矠臣腕中有千鈞力善刻玉章吳中能玉章者近推周爾森但沙砾耳其他號能切玉者亦皆倩爾森開其眉目略施以刀詭語人曰吾切玉如泥也獨矠臣治玉章始終用刀易如劃沙章法又皆妙合秦漢常語予堅者易于取勢吾切玉後恒覺石如腐如公書薄惡縫素輒膠纏筆端不得縱送也矠臣客死溫陵黃相國家印譜數帙其妾能寶藏之曹秋岳曰江矠臣死世無復有刻玉者矣其爲名流所重如此

吳平子林公兆

莆田吳平子晉林公兆能皆以善印名公兆游携里久先是歙人江矠臣以此技鳴携里矠臣入閩遂推

公兆矣。平子初作印，多用莆田派。莆田人有宋比玉者，善八分書，有聲吳越。後人競效之，至用其意於圖章，古無是也。平子從予游，見余所藏銅玉章及古今名印譜，遂一洗其舊習。近在江南，頗有知之者。穆倩石公而外，林吳不多讓矣。程穆倩，名達，歙人。陶晉江人。

### 鱉魚樽

唐皮曰：休以鱉魚殼爲樽。滌峰齋角內玄外黃，謂之訶陵樽。鱉殼閩人皆以爲杓。形既不倫，用之久久，始脫腥薰。不知曰休何所取，登爲飲器。

### 虎轉

閩中虎轉蟹之別派，質粗味劣，無足取。獨其殼極類人家戶上所繪虎頭色，亦殷紅斑駁。北人異之，有鑲爲酒器者。通州如臯亦有此種，俗呼爲關公蟹。

### 海參

閩中海參色獨白，類撐以竹簽，大如掌。與膠州遼海所出異，味亦澹劣。海上人復有以牛革僞爲之，以愚人者，不足尙也。灘縣一醫語子云：參益人沙，玄苦參性若異然，皆兼補。海參得名，亦以能溫補也。人以腎爲海，此種生北海鹹水中，色又黑，以滋腎水，求其類也。生于土者爲人參，生于水者爲海參，以遼海產者爲良。人參像人，海參尤像男子，勢力不在參下。說亦近理。

### 西施舌

畫家有神品能品逸品。閩中海錯西施舌當列神品。蠣房能品江瑤柱逸品西施舌以色勝香勝當並昌國海棠蠣房以豐姿勝並牡丹江瑤柱以冷逸勝並梅。西施舌既西之舌之矣。蠣房其太真之乳乎。圓真雞頭嫩滑欲過塞上酥江瑤柱產涵江瓣梅妃子亦生其地。其妃子之玉骨乎。他如香螺珠蚶類非不爭奇競美以三君視之特繪事之具品羣芳之餘卉姬姜之媵侍耳不足詫也。

### 夜鶯

閩中龍眼熟時專有飛盜緣枝接樹躊躇如風若巨冠然瞬息不覺則千萬樹皆被漁獵名曰夜鶯毒過於荔之石背此果人未采時蟲鳥不敢侵夜鶯一過羣蠹競起矣。

### 德化磁

閩德化磁茶甌式亦精好類宣之填白予初以瀉茗黯然無色責童子不任茗事更易他手色如故謝君語予曰以注景德甌則嫩綠有加矣試之良然乃知德化窑器不重於時者不獨嫌其胎重粉色亦足賤也相傳景鎮窑取土於徽之祁門而濟以浮梁之水始可成乃知德化之陋劣水土制之不關人力也。

### 錯認水

予過邵武之拿口高主政年八十矣餽余一經酒淡而有致與羅家錯認水無少異閩酒當以此爲第一不知其名云是家釀不能多得不能遠携每憶之輒如汝陽王道逢麪車也。

閩開元寺前舊有捲紙爲簫者。予得其一是三年外物。色如黃玉。扣之鏗鏗。以試善簫者云。外不澤而中不乾。受氣獨全。其音不窒不浮。品在好竹上。後以贈劉公載。公載爲賦紙簫詩。雲間潘君仲亦能以紙製奕子。狀如滇式。色瑩亦然。且敲之有聲。其爲五瓣梅花香盒。蒙之以錦。不可覓其聯縫之迹。皆奇技也。

德化磁簫

德化磁簫笛色瑩白。式亦精好。但累百枝。無一二合調者。合則聲淒朗。遠出竹上雲夢柯亭之外。又有此異種。入李馨手。卽至入破。當不患騁然中裂矣。

命同

閩縣徐存永。常爲予言。其王父子瞻公。諱楫。與同里宋姓者。所生年月日時盡同。少同學。同食餼於庠。同無子。至四十九歲。而宋卒。徐懼不敢出戶。其後乃相繼舉三子。卽興公。幔亭兄弟也。以貢士至縣令歸年八十餘始卒。後事乃大不同。又家姊丈文大士。密縣人。與會城路慶雲者。同年月日時生。以此相善。大士尊人惺與公爲通州守。與母夫人皆壽考無恙。路則起家寒微。幼卽孤。大士以文名當時。路僅能識之。無又先大士死十年。大士生二子。路一子沒於水。生平無一同者。惟大士食餼之年。路得補藩司掾差。相似耳。然則星命之說可盡信哉。

蘇才翁八分書

宋蘇才翁書法妙于一時。而真蹟少見。才翁曾宦閩。鼓山勒才翁二字。八分書。徑二尺。羅源縣白塔道旁。

石上勒才翁所賞樹石六字。徑尺餘。皆古勁有法。又鑿井于福州。與兄舜元齊名。

楓亭井水

興化楓亭宋徐鐸狀元故居。手植荔枝。名延壽紅。至今尚存。樹下有井。亦公所鑿。井上橫亘一石梁。左汲水重。右汲水輕。此理之莫測者。然聞武當南巖宮有日月池。相距數尺。日池色綠。月池色黑。羅浮白水山。佛跡院湧二泉。相距步武。東爲湯泉。西爲雪泉。東極熱。指不可觸。以西泉解之。然後調適可浴。造物之巧如此。不獨楓亭井水重輕也。

考亭

世以考亭稱文公。予癸巳陪巡過建陽。宿麻沙。見晦翁後人所藏家譜。知考亭是黃氏之亭。後從徐存永得見黃詩。按五季亂黃端子稜隨父禮部尚書入閩。見建陽山水秀麗。遂家焉。子稜詩云。青山木笏尚初官。未老金魚是等閒。世上幾多名將相。門前誰有此溪山。市樓晚日紅高下。客艇春波綠往還。人過小橋頻指點。全家都在畫圖間。歿而葬于三桂里。子稜乃築亭于半山。以望其考。因名曰望考。文公居近其地。世因以考亭稱之。以地稱人可也。以他人之考稱文公。于理甚悖。然公在日實無以此稱之者。後人誤謬。急當改正。

鞞鼓

今之呼冒鼓曰鞞鼓。鞞音蠻。按呂氏春秋宋子罕之鄰爲鞞工。是也。閩會城南門外。有冒鼓之地。曰蠻鼓。

洋蠻當作驍非方言也。

### 土牛

會城迎春土牛必於閩忠懿王廟前乞土始成曹能始有迎春詩馬從太守分騶去牛向前王乞土來

### 鳳尾蕉

閩中多鳳尾蕉相傳植之庭中可避火災蕉性宜鐵種者每埋鐵其下何鏡山前輩詩云欲比麒麟能食鐵真同鳳凰不羣雞公自注蕉影照日其中梗虛空若無梗然亦奇聞也

### 三蘇祠聯

長泰戴方伯燦詞林宗工也題三蘇祠云一門父子三詞客千古文章四大家極爲妥貼

### 仙門洞

九鯉禱夢海內咸知而不知去仙游縣西二十二里有仙門洞亦九何君所宅兩崖壁立可十許仞屈折西上有仙宮佛刹循洞口並澗上巨石夾漈凡爲瀑布者十數級漈窮地益闢雞犬桑麻別爲一區可五里得分水山則屬晉江界矣禱夢靈異不減鯉湖

### 雪峰

侯官雪峰之頰有泉一坎縫深數寸潮至則盈潮退則縮故名應潮然山去海潮數百里也有萬松關古木二株一爲真覺大師手植直上參天一爲閩王手植樛而蔽地所造石塔四周作卵形傳祖師識石卵

爆盡我當再來近皆荒廢蔓滾木毬亦無存矣。

僧伽

福州城內外凡巷口皆築小屋祀泗洲菩薩人皆未曉其義或有一二處求筶祈籤往往靈驗予每問僧人亦無知者按神僧傳僧伽大師西域人姓何氏唐龍朔初來中國隸名于楚州龍興寺後于泗洲臨淮縣之地建伽藍掘得古香積寺銘記并金像上有普照王佛字中宗聞名遣使迎入內道場居薦福寺常獨處一室頂上有一穴以絮塞之夜則去絮香從穴出非嘗芬馥嘗濯足人取其水飲之痼疾皆愈景龍四年端坐而終中宗令于寺起塔俄而臭氣滿長安近臣奏僧伽緣在臨淮中宗心許其臭頓息奇香馥烈送至臨淮起塔中宗問萬回曰僧伽是何人曰觀音化身也李太白作僧伽歌云真僧法號號僧伽有時與我論三車問言誦咒幾千遍口道恒河沙復沙此僧本住南天竺爲法頭陀來此國戒得長天秋月明心如世上青蓮色意清淨貌稜稜亦不減亦不增瓶裏千年鐵柱骨手中萬歲胡孫藤嗟予落魄江淮久罕遇真僧說空有一言懶盡波羅夷再禮渾除犯輕垢予又按李白生于中宗十六年己亥伽化于景龍四年庚戌白纔十二歲且白幼年未至江淮何從與之論三車說空有乎伽龍朔初入中國至景龍四年將五十年不知伽之壽若干第神僧傳與白詩全不相符按李邕泗洲普光寺碑云僧伽景龍三年三月三日坐化太白詩多有僞託僧伽歌必爲誤收。神僧傳歷紀月當不謬也李邕又爲僧伽作傳見李集

木棉菴在漳城南二十里。今有木棉舖鄭虎臣殺賈似道于此。土人云夜深時有燐火照人鬼恒作哭聲。豈似道厲魂猶未泯耶。

### 林文桔

侯官林文桔。永樂中年十四登進士。初主司擬會元。謂桔字少見。換洪英居首。然桔字見于書經。主司亦憤憤耳。

### 一榜三及第

閩省一榜三及第。宣德庚戌狀元長泰林震。榜眼建安龔鑄。探花莆田林文。一科兩解元同縣者。永樂戊子福建解元楊慈。應天解元黃壽生。宣德壬子解元林同。順天解元宋維。俱莆田人。隆慶庚午福建解元林奇名。順天解元李廷機。俱晉江人。

### 七里三狀元

福州永福縣瑞雲峰有古懺云。天寶石移瑞雲來期。龍瓜花紅狀元西東。宋乾道間天寶瑞雲寺後崖石橫山而行。齧地成溪。既而此石松上復生龍爪花。是年蕭國梁魁天下。鄭僑黃定繼之。蕭居冲峰。鄭居龜嶺。黃居龍嶼。當時詩云。冲峰龜嶺與龍嶼。三處山川壯矣哉。相去其間只百里。七年三度狀元來。俱載府志。亦海內所罕儼也。

### 鄉試二十六名

延平府南平縣雲蓋里吳氏。永樂乙酉科吳恭中鄉試第二十六名。丁酉科吳寧亦中鄉試第二十六名。成化乙酉科吳珙又中鄉試第二十六名皆屬酉年亦異事也。恭珙俱第進士。

第十九名

建陽李有年舉嘉靖庚子鄉試第十九名其弟有則舉己酉亦第十九名。有年子聞韶舉萬曆甲午亦第十九名父子兄弟榜次相同亦一奇也。又建寧貳守吳興施可大二子壽明浚明先後中萬曆壬辰乙未會試俱第十九名尤奇矣。

掾曹

明初進取不拘資格有掾史而置身青雲者自況鍾外不可悉數如閩縣吳復任工部侍郎陳永祥任惠州知府南平楊文達惠安洪炬俱任太僕寺丞連江孫瑛任吏部郎中建安盧大政任吏部主事侯官胡鼎任戶部郎中福清游元欽任濟南通判高世岳任承天通判孫瑛洪武中陳永祥宣德中吳復胡鼎天順中楊文達洪炬正德中盧大政游元欽高世岳嘉靖中

鄭鶯鶯

漳南鄭輅思觀察向與居緯真未定交萬曆癸卯緯真至閩輅思亦在三山阮堅之方爲司理大舉詩社初相見間緯真問曰鄭先生尊字鄭答曰輅思緯真曰唐有鄭鶯鶯能詩今又有鄭鶯鶯奇哉一座大笑

珠娘

福州呼婦人曰珠娘其來舊矣按任昉述異云越俗以珠爲上寶生女謂之珠娘

### 龜腳

閩中海錯名龜腳者蚌蛤之屬味劣而值亦甚賤江淹賦以爲石蛤一名紫薑春而發華有足異者謝靈運詩云紫薑憐春流卽此憐者言華也荀子書名紫蛤郭璞賦曰石蛤楊用修亦效江淹作石蛤賦云憐流吐葉應節揚葩言有花也今海中龜腳附石而生並無發花者用修好奇未有灼見耳

### 蕃薯

萬歷中閩人得之外國瘠土砂礫之地皆可以種初種于漳郡漸及泉州漸及莆近則長樂福清皆種之蓋度閩海而南有呂宋國國度海而西爲西洋多產金銀行銀如中國行錢西洋諸國金銀皆轉載於此以過商故閩人多賈呂宋焉其國有朱薯被野連山而是不待種植彝人率取食之其莖葉蔓生如瓜蔓黃精山藥山蕷之屬而潤澤可食或煮或磨爲粉其根如山藥山蕷如蹲鴟者其皮薄而朱可去皮食亦可熟食之可熟食者亦可生食亦可釀爲酒生食如食葛熟食色如蜜其味如熟荸薺器貯之有蜜氣香聞室中彝人雖蔓生不訾省然懷而不與中國人中國人截取其蔓咫許挾小盒中以來於是入閩十餘年矣其蔓雖萎剪插種之下地數日卽榮故可挾而來其初入閩時值閩饑得是而人足一歲其種也不與五穀爭地凡瘠鹵沙岡皆可以長糞治之則加大天雨根益奮滿卽大旱不糞治亦不失徑寸圍泉人鬻之斤不直一錢二斤而可飽矣於是耄耆童孺行道鬻乞之人皆可以食饑焉得充多焉而不傷下至

雞犬皆食之。

長樂瓜荔

予性嗜瓜。入閩尤好剝荔。長樂多好瓜。而邑之勝畫。尤多好荔。郭蓮峯常以瓜荔貽予。予笑謂蓮峯。安得瓜甜于荔。荔大如瓜也。北方有文官果。如栗之乍乳而加嫩。似蓮之初日而尤甘。咀則雪甜偏見含則露釀廣長。加以房中心蜜。若規楊梅之通體橫陳。室內神清。如謂荔子之將膚都豔。相傳種自上方。偶亦流傳人世。誠山中之白雲。亦寰宇之介士也。余常有結伴同爲湖目冷。層綃剝出蕙心香之句。不足形容其萬一也。但殼大而無當。實小而僅存。余笑謂友人。向欲望荔大如瓜。今但望此君大如荔子。吾事足矣。衆咸失笑。

仙霞嶺

閩由浦城往浙。必度仙霞峻嶺。高三百六十級。凡二十八曲。長二十里。宋史浩帥閩過此。始募斂石路。行者便之。

曹能始

謝在杭云。曹能始詩以淺淡情至爲工。不甚學盛唐。然其送西安太守云。長安西望路漫漫。秦華峯陰日色寒。長樂宮中奏輦絕。未央前殿漢鐘殘。月明渭水浮三輔。花滿驪山繡七盤。京兆風流誰不羨。時從閩閣畫眉看。大歷以來罕見斯語。予謂此詩尙非石倉極境。在杭學七子者。故獨體心于此耳。

錢虞山云能始家有石倉園水木佳勝賓友欽集聲伎雜進享詩酒談讌之樂近世所罕有也著述頗富如海內名勝志十二代詩選西峯字說皆盛行于世嘗謂二氏有藏吾儒無藏欲修儒藏與之鼎立採掘四庫之書十有餘年而未能卒業也爲詩以清麗爲宗程伯陽酷愛其送梅子庚明月自佳色秋鐘多遠聲之句其後所至自謂以年而異其佳境要不出于此

洪都御史

閩中鄉先生素重清議永樂乙未會元洪公英以都御史還家有十擡士紳疑皆輜重也相戒不與通公後知之微笑令取几案盡開諸笥乃圖籍耳於是出圖籍案上置十擡空櫃於案下時屋淺狹門外人咸共窺探士紳方往來如初嗟夫以此觀之彼日不但洪公一人清介閩郡風尚可知矣

閩詩

虞山先生云余觀閩中詩國初林子羽高廷禮以聲律圓穩爲宗厥後風流沿襲遂成閩派大抵詩必今體今體必七言磨礪沙盪如出一手謝在杭近日閩派之眉目也在杭故服膺王李已而醉心于王百穀風譜調合不染叫囂之習蓋得之百穀者爲多在杭之後降爲蔡元履變閩而之楚變王李而之鍾譚風雅陵彝閩派從此自燬矣

又云鄧副使原岳字汝高與謝在杭並稱詩于閩在杭推之以爲國初有十才子宏正有鄭善夫而嘉隆之後則汝高爲之冠所著有西樓全集十卷汝高嘗選明詩正聲以高廷禮唐詩正聲爲宗大率取明詩

之聲調圓穩格律整齊者幾以嗣響唐音而汰除近世叫囂跳踉之習然其所謂唐音者高廷禮正聲品彙之唐而非唐人之唐也余嘗論閩詩流派頗以後來庸靡之病歸咎于林子羽蓋有見于此

林初文

福唐林春元七歲能詩師召試之適有牧羊者指爲題卽應聲曰三百羣中步獨先有時高叫白雲天曾從北海風霜裏伴過蘇卿十九年又試以對曰風翻白浪舟難進卽答曰雪擁藍關馬不前後舉於鄉更名章字初文有集行世子古度有詩名

謝在杭十餘歲時學爲詩有人持蘇武牧羊圖者卽爲題云沙滿旃裘雪滿天節旄零落海雲邊上林飛雁來何晚空牧羝羊十九年

林初文嘗在揚子江中青山口覆舟坐皮箱上見有持紅燈二從前過隨木商救之又嘗夢人贈之以扇上題茂陵風雨四字自以爲不佳後以上書得禍作蛾眉篇因有茂陵風雨千秋夢揚子波濤一夜悲之句

娘子橋

泉州洛陽橋望之有娘子橋橋比洛陽雖低而長過之云先是入番舶壞有人得島見巨蟒夜出有光如畫因插刀穴口蟒出爲刀傷性急直奔胸破腹裂遺下明珠纍纍其人旣歸遂得巨富鄰初未知後覓富家女爲婦富家翁怪其誕妄因給之曰余女畏渡海風波能作橋又金布與橋滿卽嫁女與之其人卽

作橋布金俗因呼爲娘子橋。

金雞

武彝接筍道士程應玄者。曾入金雞下洞。從舟中仰視洞若不甚深廣。所堆木若有限。比履其所。甚宏遠。內有三丈餘楠木。上閣仙蛻十三函。每函頭顱一二片。脛骨一二斤。手骨一二節。皆裹以錦帕。一函中有鶴骨頭與足各一。又有楠木刳一舟。長丈餘。闊三尺。內細羅香末。并香灰。幾滿。而洞中香灰成堆者。亦纍纍然。上金雞洞。視下洞爲小人。不敢到。萬歷丁丑五月。有張富郎者。年八十餘。冒險入其中。則見數人鼾睡。香灰內傍有銅磬覆地。富郎翻而視之。磬下一雞。遽展翼鼓扇。香灰昧目。倉皇俯伏半晌。稍息。亟由籃縋下。半空籃掀。富郎墜入舟子懷中。無恙。後年九十終。應玄親見富郎道其詳。陳司馬又親見應玄紀其實。

嘉客紅

宋福清翁昭文先儒亢從子也。圃中非時生荔支。其母曰。豈有嘉客踵門耶。頃之莆田林光朝至。因名爲嘉客紅可補荔譜之缺。

朱竹

初但求之楮穎間。頃過劍津西山。數頃琅玕丹如火齊。乃知此君亦戲著緋爲賦二詩云。高情直與晚楓鄰。僕舞安知醉有辰。舊族傳爲絳縣老。孫枝近作赤城人。瀟湘淚盡終餘血。洪澳花繁不是春。曾在龍門

柯畔立支離更見爨中身。一亂擗桃花映客酡。斜批鶴頂間青蘿。翻新競比紅兒曲。截笛留吹赤帝歌。酒醞宜城光未定。冠裁薛縣色全訛。遙看巖下爛燭處。或是秋深柏葉多。

九龍灘

閩諸灘惟汀之清流九龍灘最號奇險。予嘗過之作口號云渴龍無數截中流。一葉斜從石隙浮。解纜戒人咸莫語。齊編竹箬裏船頭。昧爽則飯。羣起操舟。長年彼此不通一語。不獨成舟中人也。過喫時尤嚴。解纜時畏神碎。箬無能爲也。雪花翻滾浪聲洪。十八灘前九曲龍。估客到來齊減載。逆風駕起護波篷。舟出水下。借篷力以上逆灘勢急。帆卽怒觸。不敵也。刑牲載酒拜龍頭。安濟祠中笞亂求費盡。土梢世居龍上。習水性。奕世相傳。咸精其業。舟人入灘。例倩最能者爲。有冒清流者。遇他灘無辨。過九龍敗矣。都將絆索換新櫓。曲曲防他八面風。卻笑長年堅似鐵。甘心膜拜土梢公。閩人有紙船鐵梢公之謠。土梢世居龍上。習水性。奕世相傳。咸精其業。舟人入灘。例倩最能者爲。防護一舟下。返護第二舟。蓋世其業者只數姓。姓又只數人。誓不傳之于外。故不易過云。

烈女高氏

福清士人翁登墀。八歲聘高氏女。後十年墀卒。女幼養於叔家。聞變將死之。以父母在遠。未命不可死。越四年。父母來歸于翁。請死于墓。墀之父母以未立孤不許。死又三年孤立。乃於墀之卒日時縊死。

墨魚

墨魚。一名算袋魚。一名烏鯤。一名海鰈鮒。閩人名之花枝。相傳一胥吏醉墮海。周身悉化爲異物。此其招文袋也。所垂白帶。宛然浮游海面。有物觸之。輒吐墨自覆。人反得因其墨跡而捕之。愚矣。用濕紙層層裹

之敲細稻穢火燒之香熟可喫。

鱠魚

狀似墨魚出日本火炙揉而爲絲味勝墨魚遠矣。

龍虱

龍虱漳州海口每八月十三日至十五日三日飛墮餘日絕無食之除面上勗點赤氣婦人貌美能媚男子。

林清

三山林清者諭德誌之祖也避元不仕匿姓名隱居山寺太守一日入寺中見清儀表不羣問曰能詩乎曰能卽以入音爲題清應聲曰金紫何曾一掛懷石田茆屋自天開絲竿釣月江頭住竹杖挑雲嶺上來匏實旣修裁藥圃土花春長讀書臺革除一點浮雲慮木筆題詩酒數杯太守驚異因與往來無間一夕忽論海濱人物因曰若林清者雄才碩德惜未見其人林不覺歎惜守曰君殆林清耶林曰若清者公安得見之此吾所以有感也明日再往訪之已不知所之矣。

林子羽

林子羽妻朱氏長於詩詞其勉外詩云玉食叨陪近上方五雲深處列鶴行經綸樹績從人仰竹帛流芳與世長待漏衣沾仙掌露趨朝身惹御爐香功成身退歸寧日一榻清風綠野堂朱氏年十九卒子羽終

身不娶。按鴻爲員外郎。年近四十。此詩卽爲郎時作。而朱氏年方十九。豈其繼室耶。

林子羽以薦至京師應試。賦龍池春色詩。名動京師。旣歸家。從者如雲。昆陵浦舍人源聞其名。往見之。鴻不出。使弟子周玄黃玄往見之。問其來意。曰欲爲詩耳。因出所作二玄讀之。至雲邊路遶巴山色。樹裏河流漢水聲。驚曰。此吾家詩也。因白鴻出見之。定交而去。

林廷綱

林廷綱。洪武初。承太祖親擢吏科給事中。寵遇日隆。嘗侍游江間殿。太祖首唱詩二句曰。江間小殿與雲齊。梁上新添燕子泥。公承旨足成之曰。雉扇曉開紅日近。龍衣春濕綵雲低。旌旗影裏貔貅息。斧鉞門前駢驥嘶。簪筆詩成同拜舞。太平天子賜新題。又承旨作春江漁父圖。親題於殿壁間曰。浩蕩乾坤一釣圖。絲綸終日倚菰蒲。桃花浪暖魚堪膾。桑柘春深酒可酤。歲月不知蓬鬢改。江湖真與世情疎。熊羆不入君王兆。四海于今誦帝謨。後賜名恒忠。

閩貧生

閩有貧生客京師。餓寒濱死。然頗善丹青。不能售一錢。因以兩幅獻於楊文敏公榮。公題其上而還之。詩云。誰家老屋枕溪瀆。十里青山半是雲。此處更無塵跡到。祇應啼鳥隔花聞。其二云。小橋流水漾晴沙。策杖歸來日未斜。昨夜東風花落盡。一林高樹鎖煙霞。明日張此畫於市。價遂湧起。人爭一致。因而饒裕。

永福鬼詩

侯官唐灝微時泊舟永福溪夜間二鬼共語一鬼吟詩曰隨波逐浪滯孤魂白骨沈沙漾水痕幾寸柔腸魚齧斷不關今夜聽啼猿又一吟曰餓鳥隨我棠梨道雨打風吹梨樹老寒食何人奠一卮髑髏戴土生春草旣復相謂曰明日鐵帽生至當得代矣明日灝候之果有戴釜濟者灝苦挽之且告之故得止至夜二鬼復語曰今日鐵帽生乃爲唐參政所救奈何唐聞大喜遂請道士作章度鬼越數日坐齋中彷彿見二人來謝後果官至參政

林蘊

林蘊唐末就試試合浦還珠賦思之未得忽假寐有人告之曰何不云珠去勿珠還也覺而異之卽用其語遂登第後見素林公俊有族父康爲廉州二守見素以詩寄之曰破荒詞賦落人間水異川精兩愧顏今日雲仍居此地祇令珠去勿珠還蓋用前事也

鄭善夫

鄭善夫嘗雪中游天台美髯白皙毛褐筍輿戒從者勿言姓名人以爲神仙盛傳郡中太守顧璘聞之曰此必吾繼之亟使人邀之善夫答以詩云客有飄飄者閒來湖海游雲端尋雁蕩雪裏過台州白業藏賢達浮槎近斗牛豐千謾饒舌太守是閭邱

張司馬

閩張大司馬經懸車日久忽有倭亂起公總督公行止未決聞里人能以箕召仙者命卜之神良久不至

忽然箕旋轉如風。食頃乃止。大書曰。吾關雲長也。留詩曰。萬里縱橫事已空。戰袍裂盡血猶紅。夜來空有思鄉夢。雨暗關河路不通。書畢而去。公殊惡之。然逼於朝命。遂出破賊。後果爲趙文華所譖棄市。

林氏

林氏福建人。有晚春詩云。拋卻銀針到小庭。遺情無奈獨傷情。高低別院鞦韆影。遠近人家笑語聲。黃鳥曉寒藏翠柳。綠苔春盡點紅英。一年好景仍辜負。堪嘆嬌娥老此生。

林世璧

嘉靖間閩龔大司成用卿招諸賓客。及其壻林世璧同游鼓山。風日恬朗。分韻賦詩。坐客皆逡巡遜讓。林時已醉。奮筆題詩。略不停思。文藻橫逸。公及諸客讀之。至眼中滄海小衣上白雲多之句。擊節嘆曰。吾不及也。遂不復題。林詩至今尚在壁間。寺僧寶惜墨色如新。最後徐孝廉惟和讀之。有詩云。閒尋老衲叩禪堂。墨蹟淋漓滿上方。一自題詩人去後。白雲滄海雨茫茫。蓋引林語也。

黃讓

黃讓者。粵長樂儒生也。嘉靖時父墓爲山賊所發。質其骨以責贖。讓罄產贖而葬之。乃募壯士百餘人。從督府討賊。二子啓愚啓魯死之。讓出奇計。斬首二百人。降者一千七百有奇。賊旣滅。推其功於諸校。竟不受賞而去。

鄭汝昂

三山鄭汝昂善詩且多滑稽貧甚一親知令廣東鄭寄之詩云三尺兒童事未諳幾來彊扯我欄衫老妻牽住輕輕語爹正修書去嶺南其人得詩一笑因厚贈之按青瑣集有張球獻呂許公一絕云近日廚中乏短供兒童啼哭飯籬空內人低語向兒道爺有新詩謁相公鄭之詩固有本矣

宗子相

廣陵宗子相爲閩督學歲餘卒於官僚屬生儒赴弔於靈几上得遺詩三首云四海相逢盡臥龍龍江夜夜採芙蓉我今先跨晴虹去遲爾崆峒第一峯又一謫人間四十年青山萬里隔蒼煙于今更返華陽洞千樹桃花待舉鞭又長嘯一聲歸去來玉龍高駕彩雲迴獨留明月詩千首萬里寒光燭上台

謝祖

謝祖字繩夫長樂之江田人名家子嗜酒落魄歲暮有所逋負縣令韓公紹繫之從獄中上詩二首韓大驚釋而禮焉詩曰陳情淚血叩蒼天事去人非四十年祖父乞骸沾帝祿兒孫落魄負官錢身長寄食丁猶斂田已飛沙賦未蠲安得于公開活路此心一寸是龍泉又長夜漫漫夢不成譙樓禁鼓已三聲星河暗透西窓穴鈴柝寒生北斗城短褐不堪深淺雪單衾難度短長更何年早了公門賦一把鋤犁一卷經

鄭堂

閩鄭堂字汝昂者太守璿之子爲諸生有詩文名而性滑稽自號雪樵山人郡守喪妻將斂而目不瞑堂自贊能祝之卽高吟曰夫人一貌玉無瑕四十年來鬢未華何事臨終含淚眼恐教兒子着蘆花吟訖而

暝守厚禮之時正德改元守一日於西湖游宴堂故衝其前導守怒之曰作一詩可釋汝命紙筆堂卽書數苦字守大笑曰汝今始知苦乎堂卽足成之曰苦苦苦苦苦天上皇晏駕未經年江山草木皆垂淚太守西湖看畫船守亟遣之至今閩人言作戲謔詩者動曰鄭堂也

董槐

閩董槐者萬歷間人也能文彊記十七而沒父母傷之甚槐遂形見能爲母護湯藥他人間亦見之後殯於里之龍山墓樹往往蟲齧成字或蟻緣土爲字皆成詩句未必云行仙董郎其詩有云原南原北綠如烟萬囀千嬌鳥可憐擲得榆錢盈兩袖春風散買自年年又云壠頭流水樹頭鶯斷續聲低月又明誰道泉局無曉日陽臺無比夜臺清又云薜蘿未擬裁衣服躍治何曾入夢思螢亂夜空獨鳥寂山前長坐月西移如此甚多後三年蟻於墳上作董郎升化字自後絕無詩矣

轉華菴箕仙詩

福州西關外轉華菴壁上有箕仙詩一幅云綠雲出洞又入洞白鶴上山復下山道人此日歸何處雪自無心鶴自還字體龍蛇飛動不類人工

海扇

海中有甲物形如扇其文如瓦屋惟三月三日潮盡乃出名曰海扇

陳幼孺

閩縣陳幼孺孝廉偶之延平謁陸大守志孝其伯父憲副同年也拒不許見適有楚孝廉李某挾憲臺書來謁陸倉皇張宴禮甚恭幼孺上以詩云莫作青衫老腐儒黃堂那許拜階除投來名刺留中久死後年情到底踈失路鯁生歸去夜同袍嘉客宴回初知天府聯名籍不及霜臺薦士書陸大慚時楊叔向爲大參駐節延津聞其詩厚歎之結爲莫逆

徐惟和

月仙者武林名妓也戊子冬閩縣徐惟和北上過而眷之越數夕余至妓詢徐孝廉不去口翊歲下第復過竟諧繢縑徐作詩云匆匆相見未分明別後逢人便寄聲萬里歸期看乳燕一春心事付流鶯柳枝猶記當年曲荳蔻難消此夜情搗盡玄霜三萬杵夢中還見舊雲英越三年上計復過其地詢之則月仙死矣謝在杭記

謝在杭

萬歷己丑謝在杭與徐惟和下第過杭州六和塔愛其幽靜各賦一詩欲題壁間而寺僧號呼奈何浪疥吾壁吾且取水滌之在杭笑不復題越三載在杭拜吳興司理行部至杭詢之則寺僧懼罪逸去久矣在杭大笑因復題云雙旌五馬遶江城驚起山僧合掌迎三載重來渾似夢終軍原是乘繡生

劉昌言

世人常言一舉首登龍虎榜十年身到鳳凰池之句不知此乃宋太宗朝泉州劉昌言上呂蒙正相公詩

也重名清望遍華夷恐是神仙不可知一舉首登龍虎榜十年身到鳳凰池廟堂只似無言者門館長如未貴時除卻洛京居守外聖朝賢相復書誰昌言仕至工部侍郎嘗獻聖德詩五十韻得君之盛未有其比

閩中藏書

徐興公云吾鄉前輩藏書富者馬恭敏公森陳方伯公暹馬公季子能讀能守陳公後昆寢微則散如雲烟矣又林方伯公懋和王太史公應鍾亦喜聚書捐館未幾書盡亡矣然四公之書咸有朱黃批點句讀余間得之不啻拱璧也予友鄧參知原岳謝方伯肇淵曹觀察學佺皆有書嗜鄧則裝潢齊整觸手如新謝則銳氣蒐羅不施批點曹則丹鉛滿卷枕藉沈酣三君各自有癖然多得祕本則三君又不能窺予藩籬也

鬟髻

婦人戴鬟髻天下同然獨福州興化既嫁仍如未嫁處子絕不帶鬟髻有則亦爲簪首飾之具見舅姑之後卽藏去矣

閩小紀

本館據龍威祕書  
本排印初編各叢  
書僅有此本